

Evening Dogri News Bulletin

13 January. 2026.18:15 Hrs

Headlines

- बड्डे पैमाने पर सेहत सरबन्धी ढांचागत विकास ते पहलकदमियां जम्मू-कश्मीर गी इक उभरदे चिकित्सा केंद्र दे रूपै च स्थापित करा'रदे ना। दो एम्स, 12 मेडिकल कालेज ते 3 ज्हार शा मते वेलनेस सेंटर हेठली सतह तगर सेवां उपलब्ध करोआने च मददगार साबत होआ'रदे ना।
- उपराज्यपाल मनोज सिन्हा होरें 5 सरकारी मलाजमें दे आतंकवादियें कन्नै कथित तौरा पर संपर्क होने दे आरोप दे मद्देनजर उ'नेंगी नौकरियें थमां बर्खास्त करी दित्ता ऐ।
- जम्मू-कश्मीर सरकार नै JKBOSE दे चेयरमैन ते SCERT दे डरैक्टर दी नियुक्तियें आस्तै सरबन्धत कमेटी गी परतियै खेडेरेआ ऐ।
- श्री माता वैश्वो देवी तीर्थ यात्रा च श्रद्धालुएं दी खरी मती आमद कन्नै आले-दोआले आली सैलानी थाहें पर बी यात्रुएं दी गिनतरी च खरा मता बाद्दा दर्ज कीता जा'रदा ऐ।
- ते जम्मू-कश्मीर च ठंडू दा प्रकोप बरोबर जारी ऐ। जम्मू दे मैदानी इलाकें च घनी धुंध कारण आम जन जीवन प्रभावत, मौसम विभाग नै 15 जनवरी तगर मौसम दे खुशक रौहने दी पेशगोई कीती ऐ।

<><><><><><>

Health-Care Transformation

सेहत सुविधाएं सरबन्धत ढांचागत विकास, मेडिकल शिक्षा च बेहतर बाद्दे ते भारत सरकार थमां लगातार सहयोग करिए जम्मू-कश्मीर च सेहत सहूलतें च ऐतिहासिक ते दूर तोड़ी पुज्ज बनाने आला बदलाव आवा'रदा ऐ। पिछले किश ब'रें च सेहत ते परोआर कल्याण मंत्रालय बक्खिया रणनीतिक ढंगै निवेश करने करी पूरे जम्मू-कश्मीर च शहर दे कन्नो-कन्नी ग्राएं थाहें तोड़ी बी बेहतर सेहत सुविधां पजाइयां जा'रदियां नै इस अहम बदलाव

च दो एम्स, 12 मेडिकल कालेज, 17 क्रिटिकल केयर इदारे ते 3 ज्हार 166 वेलनस सेंटर दी स्थापना इक मील दे पत्थर आह्ला लेखा ऐ।

<><><><><><>

LG-Employee Sack

आतंकवाद तंत्र खिलाफ बड्डी कार्रवाई करदे होई उपराज्यपाल मनोज सिन्हा होरें प्रतिबंधित आतंकवादी संगठनें कन्नै ताल्लुक होने करी 5 सरकारी कर्मचारिएं गी नौकरी थमां हटाई दिता ऐ। आकाशवाणी जम्मू संवाददाता नै जानकारी दिती ऐ जे बर्खास्त कर्मचारिएं च इक सरकारी शिक्षक मोहम्मद इश्फाक, इक लैब टेकनिशियन तारीक अहमद राह, इक सहायक लाइनमैन बशीर अहमद मीर ते जंगलात मैहकमे च चौथी श्रेणी दा कर्मचारी फारूक अहमद भट्ट ते सेहत मेडिकल शिक्षा विभाग च इक डरैवर मोहम्मद युसुफ कुमार शामिल न।

<><><><><><>

LG-Magazine

उपराज्यपाल मनोज सिन्हा होरें हिंदू एजुकेशन सोसायटी कश्मीर आसेआ प्रकाशित संगरमल पत्रिका दा विमोचन कीता गेआ। इस मौके बोलदे होई उपराज्यपाल सिन्हा होरें आखेआ जे सामाजिक जुड़ाव ते सांस्कृतिक आध्यात्मिक धरोहर शिक्षा गी इक धागे आला लेख इस्तेमाल करिए उज्जवल भविक्ख दा ब्लू प्रिंट तैयार हुंदा ऐ। ऐसे युग च जेदे च तेज रफ्तार तकनीकी विकास ते वैश्विकरण दा बोलवाला ऐ, स्टाडी अमर आध्यात्मिक ते सांस्कृतिक धरोहर, स्टाडी सांझी सोच, कला, रिवाज ते मूल्ल स्टाडे समाज दी रूप-रेखा त्यार करडन ते देश दे पूरे-पराते विकास गी गति देडन।

<><><><><><>

Search Committee

जम्मू-कश्मीर सरकार नै सोमवारें इक सर्च कमेटी दा गठन कीता जेडी जम्मू-कश्मीर स्कूली शिक्षा बोर्ड दे अध्यक्ष, शैक्षणिक शोध ते प्रशिक्षण सरबंधत राज्य परिषद दे निदेशक दी नियुक्ति आस्तै पैनल दी सिफारिश करोग।

आकाशवाणी जम्मू संवाददाता नै जानकारी दिती ऐ जे इस सरबंधै च आदेश आम प्रशासनिक विभाग-जी.ए.डी आसेआ जारी कीता गेआ ऐ। सर्च कमेटी दी अध्यक्षता योजना, विकास ते दिक्ख-रिक्ख विभाग दे प्रशासनिक सचिव होर करडन जदके राई-बाई उत्पादन विभाग, उच्च शिक्षा विभाग, स्कूली शिक्षा विभाग दे सचिव ते कश्मीर ते जम्मू यूनिवर्सिटीएं दे वाइस चांसलर एहदे सदस्य होडन।

<><><><><><>

Lohri (Byte)

उत्तर-भारत दे बड़े लोक पर्व इचा इक “लौहड़ी” दा त्योहार अज्ज पंजाब- जम्मू-कश्मीर- दिल्ली ते हरियाणा च मते उत्साह कन्नै मनाया जा रदा ऐ। मनाया जा रदा ऐ। ऐसी मान्यता ऐ जे सुर्ज एदे मगरा उतरायण होई जन्दा ऐ। लोक अज्ज दे दिन संजा लै लौहड़ी बालदे न- उस्सी अर्घ देइयै मत्था टेकदे ना बच्चें अज्ज दे दिन छज्जे लेइयै- हिरण ते होर भांती-भांती दे दा वेश धारियै ते रिवायती गीत गाइयै लौहड़ी मंगदे ना लोक इक-दुए गी लौहड़ी दियां मुबारकां दिंदे न ते मुंगफली-गजक-मेवे-रेओड़ियां बंडदे ना राष्ट्रपति द्रौपदी मुरमू ते प्रधानमंत्री नरेन्द्र मोदी हुंदे इलावा केई सियासी- समाजी ते धार्मिक लीडरें लोकें गी “लौहड़ी” दियां शुभकामनां दितियां ना उनें आखेया जे एह त्योहार आपसी भाईचारा- सौहार्द ते इक-दुए प्रति इज्जत ते खुशियां लेइयै औन्दा ऐ।

<><><><><><>

Tourist-Inflow

कटडा स्थित श्री माता वैशणो देवी हुं'दी पवित्र गुफा च मत्था टेकने आस्तै औने आले श्रद्धालुएं दी गिनतरी च लगातार बाद्दे दे चलदे आले-दोआले आली सैलानी ते धार्मिक थाहें पर बी यात्रुएं दी गिनतरी च खरा मता बाद्दा दिक्खने गी लब्भा'रदा ऐ। इस बाद्दे कन्नै उत्थू दे कारोबारियें, सेवा देने आलें ते निक्का-मुट्टा बपार करने आलें गी लाहू हासल होआ'रदा ऐ ते मकामी अर्थ बवस्था मजबूत होआ'रदी ऐ। मकामी कारोबारियें, सैलानियें दी बदधी गिनतरी पर संदोख जाहिर करदे होई आखेआ जे तीर्थ यात्रा च बाद्दे कन्नै कटडा ते आले-दोआले आले इलाकें च कारोबार गी सिद्धे तौरा पर बढावा थहोआ ऐ। इस खेत्तर दे केई सारे परोआरें दी रोजी-रूट्टी सैलसफा सरबंधत गतिविधियें पर निर्भर करदी ऐ ते जेकर इस्सै चाल्ली सैलानी ते तीर्थ यात्री खरी मती गिनतरी च इत्थे औंदे रेहू ते

इनें परोआरें दी आमदन पर सकारात्मक असर पौने दी मेद ऐ। अपने तजुर्बे स्हाढे कन्नै सांझे करदे होई किश सैलानियें ते मकामी लोकें आखेआ

<><><><><><>

11th-12th Datesheet

जम्मू-कश्मीर स्कूली शिक्षा बोर्ड नै 11मीं ते 12मीं जमात लेई डेटशीट जारी कीती ऐ। एह डेटशीट जम्मू खिते दे गर्मियें आहले ज़ोन लेई ऐ। 12मीं जमात दे इम्तेहान 23 फरवरी थवां शुरु होआ रदे न ते एह 28 मार्च गी सम्पन्न होई जागंन। 11मीं जमात दे इम्तेहान 28 फरवरी गी शुरु होगंन ते 2 अप्रैल गी सम्पन्न होगंन। विद्यार्थियें ते अभिभावकें गी आखेया गया ऐ जे ओह JKBOSE दी अधिकारिक वेबसाईट www.jkbose.nic.in पर पूरी डेटशीट ते होर सरबंधी जानकारी दिक्खी लैन।

<><><><><><>

Veterans Rally

से नै साबका फौजियं ते उन्दे परोआरें दी भलाई-बेहतरी लेई अपनी बचनबद्धता गी फही पक्का करदे होई ए.एल.जी राजौरी च अज्ज साबका फौजियें दी इक बड्डी रैली दा आयोजन कीता। इस रैली च साबका फौजियें, वीर नारियें ते उन्दे आश्रितें सने दो ज्हार शा मते लोकें हिस्सा लैता जेह्दे च उ'नेंगी बक्ख-बक्ख कल्याणकारी योजनाएं दे बारे जानकार बनाया गेआ। इस कार्यक्रम च खेड मंत्री सतीश शर्मा होरें मुख् परौहने दे तौरा पर हिस्सा लैता, जिसलै के उत्तरी कमान दे सेना कमांडर ते 16 कोर दे जीओसी बी इस मौके पर उत्थे मौजूद हे। किट्ट गी संबोधत करदे होई मंत्री सतीश शर्मा होरें आखेआ

<><><><><><>

Sheep Husbandry

मिशन युवा कार्यक्रम दे तैहत रामबन दे भिड्डु पालन मैहकमे आसेआ उद्यमिता सरबंधी इक पैहल दी पेशकश कीती जा'रदी ऐ जेह्दे राहें नौजोआनें गी भिड्डु पालन ज्नेह सरबंधत खेत्तरें च बी स्वयं रोजगार उद्यम शुरू करने

लेई माली मदाद ते सबिसडी हासल होई सकदी ऐ। भिड्डु पालन सरबंधी एकीकृत विकास योजना एह्दे लेई इक टकोह्दी परियोजना ऐ जेह्दे तैह्दत नौजवान अपना कारोबार आपूं शुरू करी सकदे ना। ध्यानजोग ऐ जे मिशन युवा नौजवानें गी अपनी कारोबारी गतिविधियां चुनने लेई सशक्त बनांदा ऐं एह् कार्यक्रम बक्ख-बक्ख उद्यमें लेई पूंजी ते सबिसडी सने माली मदाद प्रदान करदा ऐ। इस बारै होर मती जानकारी दिंदे होई रामबन दे भिड्डु पालन अधिकारी डॉ. शब्बीर अहमद खान होरें आखेआ

<><><><><><>

Football

जम्मू-कश्मीर खेड्डु कौंसल नै जम्मू फुटबाल प्रीमियर कप 2026 दी घोषणा कीती ऐ- जेडा तौले गै परेड ग्राउंड च शुरू होग। प्रतियोगिता दा मकसद खेड्डु फुटबाल गी बढ़ावा देना ते मुकामी प्रतिभा गी मंच प्रदान करना ऐ। टीमें दा पंजीकरण मुफ्त ऐ ते प्रतियोगिता च शामिल होने च दिलचस्पी रक्खने आहले 9086310017 ते 7889424922 उप्पर सम्पर्क करियै अपना पंजीकरण कराई सकदे ना। नम्बर इक बारी परतियै सुन लाओ- नम्बर न- 9086310017 ते 7889424922.

<><><><><><>

Weather

जम्मू-कश्मीर च जंदे रोज कडाके दी ठंड बरोबर जारी रेही जेह्दे करी आम जन-जीवन ते कारोबारी गतिविधियां प्रभावित होइयां। हालांकि खित्ते दे मते सारे हिस्सैं च घट्टोघट्ट तापमान च पिछले रोज दे मकाबले ममूली सुधार दिक्खने गी लब्बा'रदा ऐ। आकाशवाणी जम्मू संवाददाता नै जानकारी दिती ऐ जे जम्मू दे मैदानी इलाकें च अज्ज बड्डुलै सवेले घनी धुंध कारण गड्डियें दी आओजाई पर माडा असर पेआ। इन्ना गै नेई बडी मती ठंड दे चलदे बजारें च बी लोकें दी गिनतरी बडी घट्ट रेही ऐ। रेहडी-फडी लाने आलें दा ते कम्म इक चाल्ली नै ठप गै होई गेआ कीजे लोक इस सीत लैहर दे चलदे घरें थमां बाहर नेई निकला करदे ना। इस बारै स्हाडे कन्नै अपने बचार सांझे करदे होई इक दकानदार नै आखेआ

तोआई, मौसम विभाग नै 15 जरवरी तगर मौसम दे खुशक रौहने दी पेशगोई कीती ऐ। उआं 16 ते 17 जनवरी दे दरम्यान उच्चियें धारें पर हौली बर्फवारी ते बरखा बरने दा बी अनुमान लाया गेआ ऐ।

<><><><><><>